



前野久三

口部ノ部

世

世

四溟山人全集卷之一

東郡 謝榛 著

東郡 蘇潢

赤城 陳養才 全校

東郡 張季彦 全校
新安 程兆相 詳校

五言古體二十三首

少林感舊篇因示鎮性禪子兼憶宗書上人

蒼蒼列峯巒鬱鬱挺松柏少林當形勝登攀幾詞客
中有惠遠流舊識非凡格謂我猶踈曠一訝頭全白
澹交偶爾忘相對復疇昔人生若沙鳥飛去不言迹

因之憶汝祖談禪坐深夕山精出陰崖天花沒亂石
寸心千佛間空然湛秋碧杖錫何所歸西方路咫尺
兩神有時會冥漠自無隔重來失暄景歲寒太蕭索
雨雪命中車相望洛城陌

兒元煒從遊沁陽途中值雪有感兼示元輝
鄴臺衡漳湄太行何間之東西共雨雪當春復淒其
紛然皓盈目寧不興汝思北堂汝親老况汝兩嬌兒
重輕俱在心應念寒與飢汝父尚行邁驅馬遠相隨
野水亦有波獨樹亦有枝慎勿虛盛年人生須有爲
廣雲自廣陰片雨惟片滋綠髮稍變白臨鏡悔已遲

此言告汝兄使汝弟兄知誰能箕裘業慰我桑榆時
雪中望少室山遲鮑叔愚不至有感

久雨變爲雪天胡苦不了倏爾結河水重之偃樹杪
近行亦遲遲遠望何晶晶諸峯擁少室雲氣正紛繞
一色大地寒居然見松篠叢莽臥愁兔牆隅下飢鳥
未全稼穡功田父嗟多少豈獨京洛難鮑令憂心悄
禪關愆我期獨思入浩渺

佛光寺

舊遊多凋殘獨幸老無恙西來窮勝迹山色資幽况
林麓聞鐘聲尋彼遠公行殿前羅羣松殿後起疊嶂

閣黎指顧間頓悟默相向萬佛具一心空然了無相
豈待入定時而能斷諸妄須彌在咫尺焉用飛錫杖
明發勿復言千崖從茲上

哀老營堡

嚴冬胡馬來不意破高壘縱有飛將軍倉皇那可恃
殺氣與人煙相侵慘如此樹寒啼老鴟月黑亂新鬼
親戚一聞變競走霜風裏寧言積血腥各認骸骨是
羣號振山巔萬淚迸湍水俯身不回顧忽復虜塵起
潛伏林谷中狡黠殊無比部落入空壁屠戮甚羊豕
劫擄又北驅哽咽苦千里男女不兩存去留見生死

生者詎得歸死者長已矣嗟哉仗鉞人奮烈向朔鄙

得王希元書有感

客子寄書來關山正雨雪恍如對面時翻然幾披閱
凍筆揮亦難言之意彌切驛樹共蕭條而能念薄劣
我今知爾心可置管鮑列人生多交游但恐久離別
盛年擬會期白首獨愁絕有懷空自歌月明誰擊節

至汾州會孔方伯汝錫園亭同賦

神交太宇間萬里猶咫尺道在無貴賤杖藜隨所適
天風吹高雲關山詎相隔良晤愜平生論心在松柏
著述誰更勞各爲殘年惜嗟哉齊孟嘗兼有不文客

命酒催我賦佳辰肯虛擲候鳥鳴聞園幽芳亦可摘
中懷頓披豁勝遊寧知夕辛苦塞門來留茲孔融宅

百花嘆

勝遊郭外園簇簇多芳樹花似去年花春來又春暮
先後總成塵寧復論新故榮枯皆有時非關風雨妬
黃鳥亦可悲浮生誰自悟撫景聊醉歌百年一流寓

除夕過東林寺同曉公談禪

林磬何悠悠庭雪復燦燦衝寒過支公相圍地爐炭
一談得真蘊貝葉徒滿案學禪若栽松老有萬枝幹
誰能頓悟間森然俱斬斷見心是道侶寂寂坐夜半

慧燈無際光照破幾夢幻生死譬朝夕歲盡豈嗟嘆
處世各有緣焉得不聚散明春杖錫行孤雲渺天畔

憶五華觀侯道士

岩堯五華山玄都據其下秋草沒行逕彌年絕車馬
我憶昔訪真撫景援毫寫鶴雛步階石松子落屋瓦
繁陰愛青蘿席地不知夏道侶話丹經因之命玉笋
寧學鍊丸還黃金亦土苴瑤草元無根俯拾秀盈把
留侯早辟穀信哉漢恩寡藏用復何人大隱任朝野
嗟彼塵垢中誰是無營者

雜感寄都門舊知

瞻彼終南山松蘿幽且邃中有一真人超然遠朝市
手握神龍珠照夜光自秘石苔積古色斗室廓天地
澗泉爲誰清蕙花爲誰媚西望徒遐思書札何由寄
嗟哉處流俗冥心可無醉鴟鴞爲家祥鳳鸞非世瑞
柰何君子交中道兩棄置不見鍼與石相合似同類
文字生瑕疵鄧林葉紛墜有家早歸歟獨歌以卒歲
歲寒元氣塞偃仰待春事

北望華巖禪院悼中庵上人

支遁昔騎馬馴鷹復懷素深知在上乘中蘊亦何露
燕京一縑流解紛仍世故魯連重齊俗意氣偶相遇
招余共山齋談禪幾朝暮別來限冥漠死生不同路
空餘薈蔔花起塔法雲住生前擲千金身後寶光聚
恍疑鐘磬聲依然出暝樹

憶金山寺兼示闍黎諸上人

茲山自開闢突作中流柱靜居元氣間蒼茫混太宇
竒秀天所鍾迥立照萬古根深接地軸永依造物主
石穴藏蛟龍山靈勢長俯綺霞幾明滅白濤任吞吐
邇運亂漁棹霏微正煙雨清若顧凱畫陰晴皆可觀
祇園絕塵氛法界自風土天曉浮圖出梵聲雜鐘鼓
老衲飼飢龍况復鳥雀聚慈悲西來心吾亦本初祖

頓悟能爲詩三昧超徐庾探勝盡南北衰病何閉戶
壯心賦兩都乘流蕩雙櫓佳人有所思采芳新林浦
還期蔣山興寧虛夢天姥

有感二首

白雲起西山悠悠上無極鴻鵠從之飛終朝殊不息
浮雲安可長羽毛自珍惜倦來棲中林回頭顧矰弋
誰能測憂心孤鳴日將夕

西眺王屋山日夕青峨峨上有冲漠人開關對松蘿
偶來廣成子所交不貴多晨興掬流泉舉首餐明霞
靈鳥從空來階前啄松花鳥性會吾意逍遙共山阿

寄言尋真者何必窮天涯

冬日有感

山高慎巔崖天寒惜短晷嗟彼浮世人勞生幾悲喜
勲業良可圖智能焉足恃凄其曉霜下北風亦何駛
塞門日吹笳感愴荷戈子將相各憂心誰甘老桑梓
不見完名者海上二疏美時復延舊游杯中有妙理
白雲半空閒澹然映流水

春雪有感

哲王能下士栖栖此異縣動欲感鄒枚曾披梁孝傳
懶癖不可醫索居起常晏嗟哉古賢達未遇甘貧賤

貫酒過比鄰春城正雪霰山川鬱葱間萬形爲之變
窟深龍尚蟄巢寒鳥自戀積陰無好懷悵望無人見

自拙嘆

出門何所營蕭條掩柴荆中除不灑掃積雨莓苔生
感時倚孤杖屋角鳩正鳴千拙養氣根一巧喪心萌
巢由亦偶爾焉知身後名不盡太古色天末青山橫

雨中宿榆林店有感

涼雨何冥冥黑雲復浩浩山行夜不休嶮巖猶蜀道
我非王程迫胡爲役衰老數口遠相將未必常溫飽
投彼敝屋間蕪穢不及掃園荒無主人馬散齧秋草

席地卽吾廬餘生聊自保隔林乞火回酌酒慰懷抱
愚者昧所適哲人見機早反爲細君嗤寧如在家好

李郡丞叔東晚過

嗜味恒欲甘染色每求茜但趨人所同信矣非名彥
片石久交心千里夢中見古來賢達者曾不棄貧賤
對君猶鄴城焉知客異縣至言鏤肝膈情豈在歡宴
高駕凌風雲短褐冒霜霰浮生各有勞鬢髮易爲變
共話幾離合促膝夜忘倦舊好可復來星河轉深院

登樓望秋山

登樓望秋山薄暮有佳色秀拔殊自然重之煙霞飾

衆鳥各知歸行人早棲息勞生詞賦間客愁復何極
高哉劉伯倫獨能頌酒德幾時偃荆扉養心在冲默

寄拙園有感

吾生巧與拙兩端不俱存老有至拙處對人莫能言
守拙懶爲主况復居此園奚奴亦習懶中庭蕪穢繁
皎月照我牀清風吹我軒貴心不貴迹達人方可論

夜會遜軒昆季因憶懶雲上人得鷄字

客居此城市勝遊祗招提中有一緇流名與惠遠齊
坐談每深夕道味甘鹽齏雨花積於前法雲落松西
石龕出慧燈一光破萬迷嗟哉寂滅後斜月空禪棲

不聞誦偈聲零露悲莎鷄諸天繞傑閣誰復同攀躋

四溟山人全集卷之一終

四溟山人全集卷之二

東郡 謝榛 著

東郡 蘇潢

全校

赤城 陳養才

東郡 張季彦
新安 程兆相
全閱 詳校

七言古體九十四首

題揚子雲草玄圖

蠶叢之國三秦西千峯上與青天齊棧道懸空歷萬
險巨竹修藤當晝迷瀑布砰訇響不絕陰壑直下垂
虹霓斑虎咆哮黑熊啼颯沓風舞雙鷗鷄路出劔門

沃野闊錦江秋水明玻瓈蜀中文物古來盛兩漢名
士特標題前有馬卿後揚子高才往往懷金閨火德
中衰世板蕩誰能皓首甘幽棲楓樹森森隱茅宇荒
涼門徑無輪蹄草玄擬易坐朝夕冥心自得窮端倪
水有汀洲山有蹊居然此道在鹽齏龍蛇知時蟄深
窟男兒志氣何乖朕校書閣下獨遺恨首陽二子光
蒿藜

邯鄲懷古

周王太削弱海宇七雄分叢爾邯鄲有謀主牢籠俠
士來如雲消盡豪華人代改霸才尚憶平原君秦昭

欲期十日飲脫難寧似齊田文叢臺羅綺但春草漳
水風波空夕曛虞卿著書何去趙魯連蹈海生事了
萬國版圖歸祖龍鼎移邾鄆竟紛擾我當 聖代道
遙人北望長天飛獨鳥浩歌不盡空躊躇千古戰場
蟻垤餘

醉歌行

嘉靖壬寅寓京
崔太傅席上作

綠草何葳蕤秋風吹復吹名園物色照羅綺轉眼蕭
條鷓鴣悲富貴可能長滿意就中憂喜多參差君不
見平原待士重然諾豪俠酬恩終是誰未必知人在
倉卒難將寶劍分雄雌故國還尋舊朋好一丘半壑

相遊嬉路傍采菊花林間指酒旗杖掛百錢隨興盡
瓦杯無謝黃金卮城頭月出任歸遲醉和青蓮居士
詩山鬼亦久立嶺雲亦低垂驚波蕩平鸛鶴渚大風
吹斷猢猻枝落落曾懷自天地前身或是偷桃兒白
首狂歌倒接籬接籬與爾偏相知且挹海霞之清氣
夜沾松露之華滋軒冕幾人老無恙野談寧結漁樵
期萬古聖愚一生死山川不異開闢時我欲買田種
黍賸釀酒丹侶遮莫留茅茨閱世獨醒太索寞請看
北邙高下塚纍纍

題香山禪院示玉峯上人

臨清人

清秋策馬湖西路孤寺鳴鐘山欲暮偶逢老衲是同
鄉相對不言中有悟人生自抱摩尼珠乾坤誰種菩
提樹何勞長撿貝葉經如來在心非在形蒲團坐久
忘爾我不知草蟲喧戶庭夜半無燈亦無月簷前松
栢何青青

狼兒澗歌

在香山東
四里許

狼兒澗東扶杖行石工斧鑿無停聲太古棲身祗巢
穴軒皇之後多有營漸傷元氣非今日三代相因棟
宇成石工死石工生天地不老青山平

弔古戰場

行行路何長驅馬來窮荒征伐幾興替空餘古戰場
連天白草動寒色拂地皂鷗盤夕陽漠漠黃沙埋枯
骨終宵無定鬼火光四野征旗但雲霧千年殺氣餘
風霜裂土封侯殊有志力平北虜更西羗將軍失律
萬夫死惜哉祗飽虎與狼生男胡爲事戎行爺孃不
見增悲傷深閨慟哭罷刀尺爲誰燈下縫衣裳託心
夢寐恍一見安得招魂還故鄉薄伐太原自中策秦
皇漢武開邊疆至今烽燧尚多警長城萬里徒周防
翻然挽轡獨歸去浩歌倚劍天蒼涼

七夕行餞別王安州

三春不見王子猷隔林黃鳥聲相求停雲悵望心悠
悠詎期千里會燕州樽前羅綺多名謳晚來新月低
簾鉤白榆花發銀河秋靈鵲架橋天女遊鸞輿拂曙
終難留歸時錦機鳴不休千絲萬絲縈別愁盈盈一
水長西流離合定期惟女牛人生相憶恒阻脩五馬
明朝易水頭我亦驅車還故丘年年今夕懷朋儔坐
轉玉衡空倚樓

送楊員外子畏之江東

龍劍千里神相通心知不在離合中都亭久別今一
晤美人又去長江東帆外水天渺無際白波如練搖

丹楓閨門樽酒復誰同孤懷慘淡生秋風亂草已非
伍胥宅百花曾繞吳王宮霸圖往事但明月浩歌五
湖惟釣翁虎丘憑高正慨古飛鳥遠沒蒼煙空莫忘
詞客踈幽意老却春洲芳杜叢

登盤山絕頂謁黃龍祖師祠

薊北來遊第一山上連七十二禪關人行巨壑泉聲
裏馬度層崖雲氣間石徑蕭蕭松吹冷萬折千迴臨
絕頂鐘響時傳下界遙鳥飛不到諸天迴無勞漢使
泛槎心揮手銀河能幾尋歷歷邊城紛蟻垤明明滄
海一牛涔老僧笑指煙霞外此意沉冥誰與會風生

平地本無因雲點太清猶是礙弔古踟躕空石堂黃
龍西去杳茫茫珠林不見菩提影寶塔長含舍利光
壁塵拂去獨留賦下嶺回看迷曉霧放浪人間那復
來月明夢繞盤山路

哀哉行四首

庚戌歲八月十
六日勇犯京師

燕京老人鬢若絲生長富貴無人欺少年慷慨結豪
俠彎弓氣壓幽并兒自嗟邇來筋力衰動須僮僕相
扶持忽驚雜虜到門巷黃金如山難解危餘息獨存
劍鋒下子孫散盡生何爲廐馬北驅嘶故主勁風吹
斷枯桑枝哀哉行天何知

燕京小兒眉目青出門嬉戲孃叮嚀一蹙容顏問所
欲恨不上摘月與星豈意今秋值喪亂兄妹散失身
伶俜北去傷心涕淚零風沙滿面食糴腥長成被髮
能躍馬陰山射獵無時停回首寧不念鄉國長城日
落天冥冥哀哉行誰堪聽

燕京少婦殊可憐自嫁北里無嬋娟臨鏡妝成數顧
影日換羅綺何新鮮正爾相歡鼓瑟瑟琴願如並蒂池
中蓮中秋月好寧長圓烽煙散落高粱川銛鋒逼人
動寒色不忍阿夫死眼前一去龍沙斷歸路吁嗟此
身猶獨全哀哉行天胡然

燕京女兒何盈盈隔花嬌語如春鶯鄰姬盛妝失光
彩顏色信是傾人城許嫁城中羽林將千金奩具猶
言輕門前一朝胡馬鳴曉眠未足心魂驚顛倒衣裳
科鬢髮驅之北去悲吞聲獨恨跣足走荆棘不與爺
孃同死生哀哉行難爲情

王主簿樂三歸自昌平賦此志感

嗟哉寧陽簿東北驚鼙鼓一身亂後回眼見蒼生苦
伏屍滿地下烏鳶誰復蓋棺歸黃土高秋鷄犬靜千
家落日桑榆空萬戶萬戶荒涼誰復存昌平道上易
銷魂有時空林一秣馬野風蕭颯吹蓬根金城晏安

不可恃長星墮地兵戈繁是秋八月朔日子同應駕部夜過三河西北星落如
雨煙塵歛起天改色虜騎雜遝當人門殺氣遙連碣
石館愁雲更失燕丹村村墟四顧豺虎亂龍荒戍卒
各星散羗童隔河霜月中蘆管橫吹夜漫漫狐奴山
下鬼火明車箱渠上人煙斷大旗風動亞夫營天意
冥冥終在漢送君東去勿復嘆對酒且歌白石爛

送劉戶曹成卿使荆楚

帝將北伐歲云暮使者南徵三楚賦借問何人當此
行東平文學今劉楨朔塞風塵暗赤縣中原戎馬疲
蒼生飛旌直下武昌道黃鵠磯頭見春草仙侶不來

空倚樓漢江東流浩浩孤鳳叫天天上聞野田鳥
雀何紛紛湘竹遙連洞庭雨衡山半落蒼梧雲雲岑
煙樹莽相似猿聲至今悲帝子有才偏抱千古愁片
月多情照湖水國計艱難非昔時君今肯醉習家池
無限楚歌入苦調秋風獨遣騷人知

送別趙郎中伯一

龍潛泥淖不損靈一朝颯起驅雷霆如君落落負奇
氣詎令旅鬢徒星星世無孔融獨惆悵誰憐張儉尚
飄零函關西望不可到安得青山長寄傲野圃風淒
種藥欄石房月冷燒丹竈向來脫畧無宦情黃金散

盡仍燕城逢人動有不平氣悲歌對酒發秦聲君不見蚌有明珠應被剖烏緣翠羽難全生中懷此去復何道客路艱虞身衰老工屋山頭一振衣披雲自拾金光草

送施侯引之歸錢塘

有客壯懷遊帝鄉問君何處家錢塘短褐無心事干謁古來國士誰相當請纓不分終孺子仗節自許蘇中郎夜擊雄劔動星斗孤燈花落寒無光丈夫行藏窺不得歲暮離樽傍南陌薊門風雪羸馬嘶郭隗臺前一歸客君才寂寞用兵時黃金有無關氣色蕭然爾乘春雷雨多

元夕同李員外于鱗登西北城樓望郭外人家時經虜後慨然有賦

僊郎邀我元夜遊聯鑣馳向都城陬憑高北望餘殺氣初春慘澹翻如秋銀花無光火樹死月明空作金波流憶昔華燈亂星斗天教陸海通瀛洲美人盛服散香靄俠少相隨簇錦裘萬家歌舞帝王州廣衢深巷連崇樓楊枝插門春不見膏粥祠戶今何由燕京女兒去朔漠紫姑寥落亦含愁城中簫鼓太平象

城外風煙邊戍頭御宴黃柑存故事濁醪不解騷人
憂洞庭佳釀醉方休來歲今宵復何處客蹤宦轍如
雲浮

送郗羽士歸青城山

道人汗漫遊人間自云家住青城山清談動有煙霞
氣流年不凋松栢顏碧桃花開春正好金銀闕下違
僊班懸壺賣藥寄朝市獨乘黃鶴今西還九轉垂成
懷舊侶劔閣彭門路脩阻時人不識僊骨殊明月夢
中聞杜宇七十二洞羣真聚天外吹笙來玉女彩雲
拂地飄異香紫鸞解歌朱鳳舞瓊漿坐及長白春飛
泉落響無今古海西高攀若木枝纔臨玄圃復瑤池
丹臺坐讀十洲記俯視浮生寧幾時燕昭漢武俱冥
漠陵廟白楊空自悲

哀少婦

誰家少婦啼道傍自言離亂摧肝腸身無完衣科鬢
髮向人顏色殊淒涼去秋胡馬犯京甸兵戈森然奪
目光胡兒驅我到沙漠吞聲不敢呼穹蒼毳幕爲廬
地爲榻鼓火炙牛斟酪漿蘆笳嗚咽動愁思欲隨征
鴈俱南翔日落黑山木慘慘風吹白草沙茫茫隆冬
冰雪亘千里苦寒墮指難禁當半載拘留今始脫獨

竄荆棘何倉皇夜乘星月認歸路空林那避豺與狼
塞門初入心稍定萬死一生還故鄉夫壻喪亡舊業
破但聞候鳥鳴枯桑縱填溝壑無復恨猶勝骸骨遺
窮荒回頭更指潮河水不及妾心哀怨長

少女詞

妾家住近都城下今日何辜來朔野不隨姊妹並乘
龍翻與胡兒同躍馬馬上歸心數向南故園桑葉廢
春蠶長顰翠黛愁無那暗落鉛華瘦不堪對月
空淒切屈指清光幾圓缺道路空迷古塞雲衣裳猶
帶陰山雪雪後驚看鴻鴈回隔河危笛使人哀龍沙

三月無青草莫向春風外落梅

夜集王元美宅賦得弄玉吹簫障子

垂老踈狂燕趙客今宵雅集王郎宅堂開屏障出丹
青雜花抱石煙冥冥中有仙匹爲誰子云是秦娥及
蕭史秦王昔日起高樓簾捲曲欄人並倚咸陽城頭
懸月明玉簫吹作鳳凰聲忽令千樹秋風生又令百
鳥翻然驚太空嬈嬈清不絕聲落萬里丹山穴坐覽
德輝下宮墻並乘彩翼凌穹蒼直上清都朝紫皇俯
視九州塵茫茫神遊元氣幾千載因之驅石填東海
祖龍駕歸多鮑魚浮雲一散河山在二仙縹緲不可

知吳歌且復揮金卮他日功成鶴書至拂衣莫負蓬萊期

題山水圖送包運司庸之赴蘆臺

披心清徹冰雪壺揮毫妙絕江山圖包生好古求真迹名齊顧凱遊京都四明畫手不易得秋水晴嵐無多墨極天形勝隨意生半壁低橫萬里色蒹葭浦溆蒼煙深上有參差楓樹林虛堂時時動風雨波底恍若蛟龍吟一掃冰綃幽興發筆奪造物古人列吾將垂釣君宦遊扁舟獨嘯五湖月送君驛路別愁新北望偏傷客子神鳴鞭歲晚長蘆去芳草相思春復春

宮詞題畫四首

曉起下階芳草綠越羅昨夜裁春服試看海棠開幾枝流鶯啼過黃金屋花落明年仍復新玉顏對鏡堪愁人

右春

風靜簾垂花竹裏銀牀冰簟爭於水夕陽猶照長信宮太液池東片雲起禁門深鎖夜如何祗恐芭蕉風雨多

右夏

青桂花開秋已半夜深絳闕低河漢起看月影落金盆纖手掬之光歷亂雙玉跳脫近水寒坐來長袖憑闌干

右秋

寒鴉暮集昭陽殿
踈雪因風上羅薦
早梅寂寞幾多
花春在深宮君
不見好折一枝
將獻君何人吹
笛徹
宮雲 右冬

閨怨

別時梨樹栽後園
結實垂枝秋正繁
摘來堆盤甘可
食遊子不歸空
嘆息長嘆臨風
踈葉下青樓還
繫紫
騮馬夜深夢着
難挽君滿天愁
結湘江雲

憶西湖玉泉寺

七秋禪林集虜騎
老衲驚魂走無地
諸天寶刹摧菩
提一火金身斷
舍利西湖風景
幾人愁日斜正
倚

帝京樓壁間若不更留偈
驚嶺法雲空自浮

橘樹

憶昔園中摘霜橘
重來正值橘花日
滿叢晶晶當殘
春池臺甫後遊蜂
出獨把一枝春
可憐匡牀把酒
非
吾室去秋此地紛
干戈胡風吹樹
柰爾何上林秋色
亦悽愴仙宮月
冷停笙歌遙徵
猛士已云多待
時圖
功且議和漢廷
况有丙魏在年
年雨露沾枝柯
橘兮
橘兮爾無恙逸
民終老青山阿

墮馬

信宿狂歌花竹叢
歸來驅馬凌長
風青山賦就自
滿

意安知一蹶湖之東死生倏忽馬蹄下浪遊非是養
生者夢落瞿塘白帝西孤石如象浦煙迷杜陵老子
笑同厄坐聽鷓鴣花外啼僕夫喚起山日低何事鳳
城淹歲月故園隨意有攀躋相伴衰年獨杖藜嶮巖
莫道呂梁壑平地風波亦太惡

送周一之從大將軍出塞

長劍斫山石可摧勁弓射海波能開宿昔相逢重然
諾意氣干霄不可回酒酣獨上黃金臺吳歌忽斷天
風來曾笑要離空俠節復輕郭隗非竒才二十餘年
滯京國俗塵總不關胸臆一朝長揖大將軍材官相

顧無顏色丈夫穎脫自有時百年遭際幾相知陳琳
倚馬能成檄王粲從軍還賦詩昨夜秋風吹大旗據
鞍喜動幽并兒鐵騎連營亘千里餽餉日日無停期
喧闐笳鼓長城路沙擁潮河仍北渡殺氣遙沉白馬
關暮雲橫斷黃花戍單于已遯尚屯兵嫖姚看逐西
山兔閨中月照流黃機應念征人犯霜露

陶淵明圖爲楊考功虛卿題

異代知心不識面年書甲子甘貧賤孤雲橫天高莫
攀白石在水清自見徵君歿後柴桑空千古猶存五
柳傳彤庭九錫加寄奴典午山河王氣變南國從教

麟鳳歸中原不息龍蛇戰彭澤縣前江水流當年心事同悠悠解印那堪白日晚還家不負黃花秋吏人送酒方適意惠遠更教蓮社醉中懷久矣齊死生一卧茫然失天地醒來興感歲欲殘金陵悵望空龍蟠獨賦荆卿聊寄意風吹落木江聲寒

賦得長江行寄尹祭酒崇基

長江穩流自西來大禹疏鑿殊神哉勢雄吳楚幾千里朝暮轉折喧風雷青天突起白雪堆石頭影落潮聲回楓林蘆港漁父睡片月晶晶霜皚皚北斗倒插老龍窟明珠光閃煙波開詞臣獨登天上臺金山雲

合疑蓬萊目極蒼茫擬作賦寧言郭璞專仙才動浮元氣竟何物陽侯莫知天地胚行人迷津不可涉卽今待汝爲舟楫吾將南去一觀濤秣陵秋高下木葉

西園看花行

地栽松篠相參差疊石成山更設竒上林勝景誰能移晴雲暖日臨臺池流鶯百轉桃李枝間關似惜芳菲時王孫白馬鳴金羈聯鑣不負西園期看花生怕風雨天博山香靄浮瓊筵青娥纖手調朱絃度曲揮觴春可憐金銀高堆耀目前絕代豪華無百年北印月照松楸邊此時不醉愁相煎

張令肖甫郊餞聞笛兼慰盧次楨

嚴城西畔開離筵，郎官送客斜陽天。有人吹笛正淒
愴，晴雲改色迷山川。野風太急萬柳折，倏忽波濤翻
九淵。驪龍驚起珠欲墮，亂鳥無聲愁向我。梅花一曲
何斷腸，蕭瑟零霜肅滿坐。盧子揮淚不勝哀，銜冤垂
老誰憐才。君不見，襍衡傲岸成禍胎。鸚鵡洲上多莓
苔，騷人往來酌酒杯。黃祖于今安在哉，當秋苦調莫
三弄。聽徹躊躇轉悲慟，張令知心不可忘。關河月照
滑臺夢。

烏夜啼三章爲蜀中張孝子賦

其子肖甫
宰滑縣

銅梁城頭烏夜啼，北堂有子心獨悽。巴人興哀唱昔
里，巴江不返東流水。

銅梁城頭啼夜烏，北堂有子同哀呼。狐墳只在南山
側，浮雲不辨松楸色。

銅梁城頭烏啼夜，有人痛哭北堂下。空山丘墓生蒿
萊，春風不解終天哀。

冬夜過李黃門仲西別業

萍梗悠悠嗟異縣，歸騎兼宵踏河甸。烏雀安棲我獨
勞，四郊寒色經霜霰。仰看星斗過橫橋，行入空林路
難辨。數聲犬吠村巷深，中有僊才青瑣彥。夜深敲門

驚是誰兒童秉燭出庭院主人倉皇倒屣迎應憶論
交自貧賤盛年把手恣酣歌詎期衰老同芳宴當春
訪君花滿園黃葉忽催節候變浮生去住各有營一
年歡笑能幾見秋來諸郡競練兵梁宋纔休赤眉戰
坐談世事所見同殘月漸高兩無倦當時魏武掃群
雄力盡中原起臺殿豪華已逐衡漳流千載空餘銅
雀硯眼前富貴何足羨但願開樽長對面

寄李都閩賓玉時赴雲中

龍西自古多名將燕趙雄才幾凋喪李廣流風到爾
長髯共訝封侯相漢家用武憶當時萬里開邊殊

有爲去歲狼星照梁宋銅馬繽紛遭亂離三秋兵火
延村落可憐稼穡餘烏雀烏雀不知干戈愁飛來野
外復城頭誰家公子好彈射青衣擁道嘶驂騮人生
憂樂不同志白髮將軍勞遠思幾載力田窮六韜一
朝應檄驅千騎獨橫劍氣凌長虹五合地名大戰乘天
風倏忽妖氛掃地空功成始識真英雄薄賞此行何
感慨爾瞻斗極向絕塞南北風煙各自秋 聖朝天
定華夷界麒麟舊閣耀丹青上有全才幾神會皓月
寒侵虎帳間黃雲晝黯龍荒外遙知令嚴夜寂寥朔
野零霜滿旌旆

小姑謠

阿婆使妾舂稻梁小姑又喚縫衣裳一時不應小姑
怒可堪顏色來風霜小姑打時只袖手小姑罵時只
閉口眼看小姑也嫁人姑嫂不得長相守聞道比妾
小姑多小姑他日當如何

餞別張逸人子書宿漳河旅舍

鳴鞭相送遠遊子北渡衡漳四十里春雪留人凍馬
嘶晚風攪樹寒鴉起回首安陽第一橋野亭樽酒復
中宵他年有意傳書札海鶴冥冥不可招

秋夜園亭遣興柬德平王

誰度浮生能適意東林曾許陶潛醉天涯久客歲時
愁日暮獨醒風雨至王門有酒送何遲要和山人乞
酒詩園中煮茗消清夜月照蒼然松桂枝

蜀中行贈李鴻臚仲白

帝京憶昔金張主禍機焉知側目覩漢黨隻身不留
行全家奔蜀爾更苦客子畏人澆俗間亡命誰爲孔
文舉出城四顧非中原紅葉凋烏桕樹玉壘悲歌
萬里秋錦江卧病三更雨久惟患難何所營歲暮蕭
條有環堵九口淹留半死生兒女遺骸寄蜀土家在
高都祗夢歸淚灑春風啼杜宇浮雲忽散青天回短

劔方彈紫氣吐去時三峽逐驚濤直犯蛟龍蕩雙櫓
歸時棧道不知難秦塞桑村聞社鼓田園宅舍屬他
人衰白相憐有鄰父海鯨出躍醒眼中涉盡風波守
蓬戶老憑几杖且幽居靜夜銜杯月正午君不見銅
山鑄錢空差峩豪貴安在笑千古

寶劍篇贈王希元之遼陽

天開茨山鑄鐵英七星上護蒼龍精動拂寒光照朔
野三秋風雨匣中鳴國士佩之增俠氣詎學季子徒
縱橫久藏靈異發浩嘆一逢知己快平生憶昔神交
寄雙鯉中有尺書通姓名邂逅天涯兩披豁樽前不

盡江湖情古來放達在我輩半醉相隨歌月明虜騎
憑陵忽深入宿酒未消心魂驚幾處材官死鋒鏑千
家妻子號柴荆每談邊事自抵掌于今北闕誰請纓
咫尺鴈門不得到探竒直向榆關行鷗西紫塞日慘
澹馬上青山雲送迎有才未必竟淪沒鶯花莫憶廣
陵城歲暮別君正冰雪滹沱暗咽東流聲錢別代州城外滹沱
河之源出秦戲山

金閣寺夜同海公談禪

西來梵語自渾淪譯出文章恐失真從此諸宗轉岐
路超然獨見竟何人金閣談禪坐永夕魑魅竊聽傍

松栢慧燈不滅長照心門掩空山萬籟寂

示本海禪師

山僧相款正殘臘一問無生數言答潭水有天涵定
心澗雲不雨護禪榻駐錫空林幾歲華那知冰雪侵
袈裟詎待談經五六月滿山湧出金蓮花

同李兵憲廷實劉計部伯東宴集因談五臺

山之勝遂賦長歌行

殘冬遊五臺幾步一徘徊石罅松根出雲端山勢來
地接龍荒莽無際疎林但見冰花開絕頂下連萬丈
雪陰崖長積千年苔經過險巖有藜杖天許詩人獨

放曠青山不斷馬頭前紅日忽翻鴉背上我來轉折
無盡時竒處復竒難形狀焉得江南顧凱之爲予寫
成巖壑障五臺山高齊插天開闢有色同蒼然平生
想像勞夢寐到時飄逸如登僊躡屩越丹崖揮手拂
紫煙化城金界未深入遠公逝矣誰相延靈脉永存
功德水彷彿徹耳來飛泉令人心思淨於洗不根突
出紛青蓮指點煙嵐動廣席何當驚嶺共攀緣二君
壯圖逢 昭代豈暇聯轡遊山川向予嘆息且酌酒
日下圭峯重回首

送許叅軍還都下兼寄嚴冢宰敏卿

天上使星臨鴈塞滿城風雪蕩旌旆犒賞連營倍戰
心胡兒已遁龍荒外君不見岢嵐州雲連雉堞生邊
愁寒天慘澹日易落偏令鳥雀羣啾啾鬱汾結水高
於岸逝水暗咽翻西流防秋復防秋不虞歲暮烽火
稠黠虜交攻孤壘破馬牛去盡犬獨留犬蹲屋角吠
山月魁打鐘聲登戍樓三關父老且揮涕當代應多
衛霍儔令人白首待勲業古人壯志圖封侯都護時
能練士卒還念嚴冬窮到骨窮愁有骨可聊生猶勝
無功此身歿胡騎又從西北來停鞭幾爲蒼生哀
聖朝自有山吏部授鉞懸知簡將材

慶雲上人歌

上人姓王氏兩淮運副之子慶
遂棲隱卦山之
西有宗風焉

十年城市斷行迹秀拔峯巒暫登陟錫杖今隨猿鳥
羣錦衣昔變風塵色滿窓松影一龕經說法夜深山
鬼聽金界獨棲月晶晶玉枝已折春冥冥高眠石榻
遠華屋不復膏梁祗盤菽心絕世緣溷太空身當禪
定倚枯木東林誰識遠公流蒼蘂花開幾度秋自別
王門歌舞地白雲清磬共悠悠

張子翔畫竹歌

張郎寫竹多妙思筆底驟來風雨勢半空截得數竿

秋眼中楚天不盡意鳳凰暗泣湘雲寒江濤攪碎青
琅玕神功咫尺不可測澄心坐倚孤篷看試向瀟湘
結廬足幽事四圍籬落擁煙翠陰晴寒暖同不同變
化無窮出曾次揮灑對人無苦顏恬澹存之方寸間
君不見九嶷依然帝女歿至今淚迹猶斑斑黃陵廟
西日銜山一梢不動秋自閒力到古遠得三昧飄然
逸興九霄外有時夢着雲溪翁迺父號雲溪能畫笑道羽也
天機通要知曠達不凡處莫使人稱真畫工

擬裁衣行

天南越嶠鬱蒼蒼芎葛結陰巖壑傍越女搴條共笑

語野風細吹脂粉香曉星出門落日返一家姑嫂時
相將千絲萬絲手中過要織織縞如許長閨中咿嘍
鳴機杼幾八力織纔盈箱數匹較來一匹強却爲野
老裁衣裳着身便有煙霞氣青山何處非吾鄉步虛
好追松喬輩采芝更逐黃綺行葛衣之輕當炎暑狐
裘之重禦雪霜被服及時無輕重人間萬事多參商
舞翻廣袖發浩唱不羨接輿爲楚狂且掛薜蘿坐傾
酒滿園月露澄秋光每逢七夕仰河漢天孫餘巧散
下方我欲登樓酌椒觴擲梭一女兮使人嗟嘆空徬
徬使人嗟嘆空徬徬

葬枯骨頌上鎮康王

清明野柳搖晴煙家家墳頭燒紙錢歲增黃土掩宿
奔還生芳草相新鮮復見白骨交加暴風日但逢陰
雨多淒然欲問無言隔冥漠不覩面貌焉知年死也
何辜生也何愆肉飽幾烏鳶餘腥螻蛄蟻纏有靈無定
焉颯旋或變鬼火中宵燃鎮康王者感念切命人俯
拾陌與阡萬骨同埋鄰黑水黑水河在潞安更酌
椒漿達九泉地下銜恩皆欲報百代願為耕福田每
葬枯骨擬西伯未枯之骨尤可憐月照層樓坐深夜
俛仰自知心有天禮樂仍兼義聲傳野犬特頌陰隲

篇

龍山萬松歌題栗別駕道夫書齋兼呈乃兄

僉憲仁夫

龍山萬松鬱蒼蒼誰栽如許經千霜上有突兀之榦
元氣同乎浩蕩下有交錯之根地軸接乎延長起商
颯以鳴竿籟帶晴霞以露文章煙梢鶴唳石洞龍藏
龍著歲功雨自足松連野色雲何妨久蓄膏液荷神
物化爲茯苓作仙糧自君退休愛服食客來揮塵談
老莊啓兩漢關鍵簸六代粃糠曠世逼高古令人歸
混茫海波無際識大方恬澹甘隱漁樵鄉金銀氣動

破夜色簷楹天近搖星芒卿家况乃二陸輩 聖朝
輝映聯珪璋瞻彼中原魏哉大行何人鍾此靈秀匪
伯仲孰能當

上黨歌送趙兵憲子振擢平涼苑馬卿

朝出上黨城道傍父老悲嘆聲借問悲何事我公邊
有關西行來時鳴寒蟬去時生春草每恨來何遲復
恨去何早那知食祿心常懸心與白雲俱澹然能辨
秋毫訟庭肅皎如霜月當中天惜哉鎮靜不滿年僕
夫膏車催別筵遠我晉風俗向彼秦山川幾群駉牝
重邊務戰伐從今縈百慮秋雨忽高涇水波夕陽半
隱蕭關樹君才此屈將何爲朝端巨源胡不知鳳凰
背日斂文彩阿閣碧梧空舊枝

上安慶王誕第四縣主天仙歌

昨聞仙樂鳴笙簧曉瞻紫氣騰宮墻金母命下崑崙
陽陵華飛瓊騎鳳凰雙成來後復安香輕曳珮環聲
鏘鏘珊瑚交映明珠光丹葩和露垂兩廂幾叢蘭蕙
含幽芳雲鬟霧鬢勻宮妝妝罷正襟拜高堂阿母姆
教嚴於霜列女傳中賢且良家家女兒繡鴛鴦也須
拈針坐閨房屈指秋期生早涼白榆花發銀河傍
填烏鵲爲橋梁天孫向夕乘七襄月近朱樓綺席張

焚香默禱酌瑤漿人間乞巧徒紛忙百巧偏分姊妹
行因之擲梭織流黃五色蚕繭出扶桑織手縑絲動
盈筐應織王孫雲錦裳捲舒奪目輝文章數匹珍重
投金箱蓬島玉童憶西方仙胎迥異元氣長木公幾
度遙相將禮樂共擬河間王年年舞袖好稱觴歲寒
雪霽挺松篁海山不盡天茫茫

過丘以恭官舍因談虜犯汾陽兼懷宋伯鎮
孫格卿二大叅齊恩欽太守漫賦長歌行以
紀時事

沁陽城頭駐落曛肩輿過訪丘叅軍對我數言見中

蘊薄遊聊爾依河汾其如戎事僅衣食歲時無恙寬
曾臆但願屯田禾黍豐漢兵虜騎各南北不意驕虜
遽憑陵郭外亂離空稼穡閉城堅守兩書生萬夫一
心鬼神力單于氣折宵遁時視若窮寇那輕追人家
啓戶出鷄犬女墻拔旌閒虎貔老翁拭淚殘喘定手
撫兒孫問汝飢不有宋叅政滿城難保萬億命不有
齊太守蜀闔殺傷如拉朽朝端論功有重輕亦知賞
罰俱分明黃堂轉擢知有日歸者巖棲寧復出何人
相代運籌問習戰能精孫武匹三關明月漢家秋不
使胡兒吹鬻策

張光祿元易惠高麗硯賦此寄謝

昔年惠我高麗硯端溪碓眼未足羨手摩細潤紫玉
光殊方竒秀訝初見遙憶何山鑿此石山靈無言應
自惜西來萬里歸詞人銅雀舊瓦無遺澤潑潑滿地
黑雲吐恐惹飛塵掩蓬戶神龍吸去騰九霄更爲人
間散墨雨墨雨何以慰蒼生嗟彼題橋漢長卿野夫
幽意在河嶽點染兔毫詩又成百年有賴伴幽獨不
說羲之萬筆禿案頭山水小形勝俯仰乾坤此書屋
朝夕相對浮海心寄聲好謝張光祿君不見覃懷驛
樹搖落秋別思淒風生馬頭

南海颶風歌傷梁比部公實兼寄梁中翰思

伯嘉靖癸丑歲公遊羅浮山命僕具酒殺
不從黃泰泉泛海之誠遂遭此變云

譽也少年抱竒志視彼功名一絀事勝遊探盡金錯
囊浮生自不爲身累泛舟直欲窮南溟數拳歷歷遠
山翠彈琴偶爾出魚龍仗劍倏然遁魑魅阮瞻執論
亦何迂酒殺滿前破清氣半醉狂歌徹九霄冥真海
若寧無忌雲連島嶼壓林薄風亂波濤失天地鐵網
撼折珊瑚根龍珠走丸無定位鼉鼉乘勢太縱橫織
綃迸散鮫人淚雷聲轉怒不少息日影倒翻忽欲墜
長鯨呼吸命須臾少婦深閨駭夢寐幽明殊路古今

才王勃有靈疑作崇主僕幸爾俱生還眼前不到羅
浮山濺濕秋衣萬腥積布帆無恙落沙灣詩草裹藥
亂神思小齋卧病蹙愁顏六月荔枝不復摘歲暮梅
花寧復攀垂名何長逝何促中原聞計幾人哭 帝
京舊社同竹林獨嘆于今半鬼錄此謂有譽宗臣嶺
南靈秀遽然歸文德並耀空馭歎五羊城外埋仙骨
松楸慘色映殘暉故鄉舍人繼大雅采詩高古邇來
稀遙知存歿自神會恍聽越吟入紫薇不堪悲動絲
綸閣御樹摧枝霜霰飛

雨中同鮑叔愚鄧廷獻二明府盧巖寺觀瀑

布泉漫賦長歌

洛中金界通西域疊嶂相連興無極畫圖濃淡自天
開澗樹嶺雲真水墨宦侶羈人隨勝緣頗同懷抱異
筋力題名絕崖能定心指顧沈寥臨叵測爲愛此泉
今復來遮莫陰晴皆有得素絃倒瀉半天聲白練長
懸太古色松亭坐賞清吾神衰年後遊焉可頻黃葉
雜苔秋寂寞樽前不遇桃花春來時風雨迎去時風
雨送山靈未必忌詩狂何阻躋攀訪仙洞老衲鳴鐘
車馬歸人間幾夜盧巖夢

高高篇賀張總督汝喬生孫

崇門喜色映秋日洛城東南中嶽出地拔群秀向誰
家山靈闕人重陰隲老子若高高有兒猶二室二室
諸峯鬱差我歷歷如孫天外羅君常臨眺自神會始
生一孫後漸多安得虎頭盤礴心逾苦筆掃六十峯
巒帶煙雨造物藏用妙爲主曉起披圖坐茅宇千年
詩禮皆趨庭兒復生孫兒復祖君不見元氣流通自
太古忠孝相傳厚風土聽我放歌君舉杯爲君試學
鸚鵡舞

金谷園弔古

呂子性招予暨呂伯仁
遊眺別墅賦得此篇

代漢當塗高典午乘其後况復文軌同正心安九有

羊車遊幸羅玉頰淫樂轉多豪貴間金谷那期綠珠
死無由並葬歸卬山一撤錦步障雲霞空自好不見
珊瑚樹枯桑夾古道嗟彼季倫何所爲焉知美名萬
世寶昔年鬪富等風花今日詞人弔荒草

夢瑤池篇寄上大家宰吳汝喬大司徒劉體
乾少冢宰林貞恒大理卿劉致卿中丞朱自
充鴻臚卿史應之諸公

往年披閱山海經崑崙夜入夢中青瑤水虛涵月與
星琪花擁石煙冥冥金母相見授寶訣紫霓長裾飄
廣庭醒來不見鸞鶴舞仍依草莽閒柴扃憶昔穆王

何獨幸八駿交馳造仙境白雲聯謠傳至今自非仙
骨徒引領神遊可到萬國西無緣那得躡丹梯江南
攬勝猶未遂却欲黃河源頭還杖藜三晉淹留湖海
士偶逢吳客談揚子面前空闊信無地浩蕩波聲坐
中起天落混茫如掌平金焦雙秀出煙水龍窟深淺
問篙師下窺明珠探復止千帆晚泊大江灣叢蒿亂
蒲燈火間長干女兒唱新曲買醉阿誰不解顏狂興
將闌曙色動起看月落鍾陵山鍾陵山在何處建業
城高勢相據地連吳越雄東南偏助六朝幾詞賦燕
子磯籠翠柳煙鳳凰臺壓丹楓樹老年悵望立中原
向平五嶽復何言路無遠近有難易恨不生垂天羽
翼任飛翻杜蘅又老滄江渚索居守拙誰相與我願
聖代多賢臣身閒堪作漁樵伴家宰司徒抱經濟廷
尉中丞懸大計正直更羨鴻臚卿一朝俯念回先
帝方喜戈船不動海戍清稻田其柰又侵歲夜深共
仰紫微垣萬里無雲正秋霽

春江曲

望極蜀嶺雲愁深漢江水一派西來幾千里春流綠
色映芳芷遙憶三巴遠遊子波搖即影棹鳴時妾影
徘徊即不知

汾州以來分守叅政如胡世甫葛與立馬子
懋程信夫彭克憲陳元卿李子高宋伯鎮孫
格卿張時芳紀恒甫諸公皆舊識也宋有禦
虜之功不見知當道解官歸越嗟哉

邊塵連歲靜於掃胡馬曾嘶汾上草落日偏增流水
寒白雲不減青山好宦遊此地故知多半是閒門雀
可羅伯鎮守城功自見農桑依舊滿西河

賦得姑射仙人歌呈孔汝錫詞丈

姑射山頭騰紫氛石牀危坐一仙人洞門前擁千松
筠珮環步曳朝蒼旻赤霞可裁綠蘿可紉明珠長照

不壞身每談黃老關經綸手揮玉如意遙指蓬萊是
東鄰披心捧出天上月吐氣散作人間春丹書寶訣
當自珍祗恐陰嵯魁噴我憶安期噉異棗換此仙
骨寧無因相逢約予驂雙鳳共尋金母登崑崙案傍
小童何笑頻倏忽蘭茝變荆榛古來有激鵬力振
海天欲盡仍馳神攬勝羅浮窮百越探竒河嶽經三
秦滄溟舉爲杯鄧林伐爲薪龍性叵測誰能馴子牙
終辭渭水濱莫言志士空綸巾醉來謔浪把君袂道
我醒時狂是真松花酒熟葵菜新几杖相依舊主賓
大家傾倒殊相親試看浮雲去無迹好山依舊青嶙

山句

留贈唐永堅醫士胗脉歌

寒城落月鷄聲徹叔和招來踏冰雪入門不揖坐我
牀殘燭搖光花尚結脉探指下兩無語小鮮撥泥分
瑣屑飄飄水母逐波輕表裏浮沉得甄別衰年無恙
竟何似石澗細泉流不歇能定爾心知我心勿復雕
龍秣安拙老木須防一星火顛崖莫透萬蟻穴命若
懸絲生死間繫之造物寧愁顏古今來往等朝暮聖
賢不見惟青山道我隨時開笑口桑榆晚景福應厚
世無仙客食九霞嗜欲病源誰不有少年偶病卽長

逝一生病多翻自壽身便踈懶神常存願養爲先藥
餌後別君東去雲渺然囊中出錢且沽酒太行千轉
重予思天末夕陽垂馬首

賦得長歌答許左史殿卿兼傷李廉憲于鱗

梁國仙才許長史別來神會書千里書中淚漬尚盈
紙舊交爲失滄溟子眼前勲業逐流水百年行藏半
日誅足踏天風超駮駟山崗振裂叫虎兕要奪精華
與骨髓秋風細咀黃金藥正色染心陶令是石火鐵
鎗煎鳳嘴文輝靈液豈徒耳海右茫茫聯步履終童
請纓那可恃伏生傳經竟老死

終伏二公地勝時乎
皆濟南人

磨崖紀鵲湖清淺映芳芷麗人桂棹空自艤佇立亭
亭思靡靡不見馬援南征載蕙苾存歿無言爭秋水
西署爲郎談義士魯連排難寧專美予昔爲盧龍也
枿也一夢裏欲達哀情託山鬼九泉有知長已矣薄
暮下簾獨隱几冥冥莫測造化理

放歌篇有感

君不見俠少縱橫自今古吳鉤照夜精靈聚又不見
青鸞羽毛織成衣天孫至巧密絲縷竒才恐是不祥
物陸機終非海鶴主吾欲遙訪浮丘公緱嶺攀蘿問
樵父朝穿參差不斷之石林夕探幽深不測之洞府

白頭老子乘雲霞黃口小兒使風雨生命脩短誰可
期碧天皓月兩無語家在齊東歸不歸人間萬事掩
蓬戶

大司馬總督王公學甫寄詩數篇賦此答之

燕京曾醉仙卽宅勝事相違憶疇昔揮觴舒嘯興欲
飛至今猶夢花前席宦途旅館二十春北塞尚書上
黨客一騎遙衝風雨來寄書切爲衰年惜更讀新詩
解我顏評品懸知幾探蹟力如橫山豁中斷太古天
教巨靈擘威如嚴霜下朔野萬鳥伏林晝蕭摵響如
五更長樂鐘半空悠悠落九陌勢如洞庭湖水平元

氣混茫藹無迹雄才心手兩奇絕信筆縱橫少勅敵
不道齊梁綺麗篇騷雅殊能變高格軍中玉粲抱經
濟隨機不做運籌策衡門偃仰託 聖朝髣髴旌旄
在咫尺何當促膝坐深夜君笑掀髯吾岸憤獨破玄
關見內蘊魑魅暗驚走峭壁拾遺供奉神可交倚杖
前除涼月白

離感篇遠示元燦元輝諸兒

移家鄴城接建安西來輶軻懸憂端異鄉感懷殊不
寐劔閃七星燈下彈魯縞齊紃價易買越羅蜀錦人
爭看無計療窮癡兒怨糟糠老妻任艱難不見少陵

幾口走棧閣賴有橡實時充食白帝春歸同寂寞錦
江月出兩團圞中原兵戈阻舊國胡塵殺氣相迷漫
我逢 昭代幸無恙晉俗留人驚歲殘又不見要離
何爲火妻子羈圖直欲功名完身後梁鴻並蒿里不
如五噫行歌石可刊久雪敝衣惜奴婢漫將詩草發
長嘆呂望八旬持釣竿困龍且向積水蟠誰道頽年
氣傲岸四海交游曾結歡公門了無一字千秋澗照
心無波瀾小儒孟浪竟何益睥睨寧知世路寬暗灑
淤泥污巢許箕山忽崩頽水乾神明在天笑魑魅時
復清風吹鶡冠俯視人間盡浩渺獨登萬仞之峯巒

吹笙愛聽子晉曲仙骨能勝鶴背寒

紀勝歌寄贈張廉憲肖甫

別來十載各風土路出南中吟思苦才逼揚馬由地
靈宦遊萬里多奇覩楊慎已歿誰論文昆池雲霞浩
吞吐碧鷄金馬並秀峯伏波銅柱獨懷古况復身經
瘴癘鄉百粵九疑感時序壑陰閃日息鬪龍樹晚生
風振哮虎龍虎令人起壯圖能著神功靜海宇北門
西轉憲節飛誰伴汾河弔漢武仙姿不老虬鬚長想
像扶筇重延佇有因成夢渺茫間一笑無言忘賓主
醒後開軒曙色寒蒲萄垂蔓滴踈雨

劉舜謨趙允書高德公三子晚過因談詩法

漫賦長歌兼述別意

我冠野服非九質對榻論詩坐終日力搜東海寶珠
來法轉西天龍象出楚猿亂聒夜冥冥誰聽湘妃鼓
瑤瑟欲爲古調高可躋賦聲好振太行西莫畫少陵
神自合更深夢落浣花溪江通魚腹山無隔月照峨
眉路不迷醒來歸思候晨雞春草未生羸馬嘶黃金
築臺戰國術何必郭生志與齊鳳城花時興逾遠北
嶽有靈迎杖藜攀蘿躡屐殊蕭散筆掃層崖秃千管
氣橫大漠鷗不飛響徹空林虎應斷荷衣獨立最高

峯老骨欲仙無寒煖洗兵馬得挽天河陰山單于近
納款尚思朋輩共離樽燕趙茫茫目力短壯懷奮激
歛乘風若木扶桑指顧中他年相見重把手寧羨征
南矍鑠翁

良將頌寄上大司馬王公學甫

秉鉞年深見威力壯圖能剪大鵬翮志擬善射飛將
軍發矢驚人直透石漢家武庫太森嚴驕虜欲窺信
無隙千古全功此一時日月當天照心赤中興麟閣
半空起窮兵衛霍焉足恃 聖王寧復宵旰勞謳歌
四野樵蘇子廟謨邊計內外同屯田歲豐村釀美遙
知恩加玉帶光照耀甲兵一秋水秋水無波霜後清
鼉鼉守穴何分明健兒出獵各滿意肯教狐兔常縱
橫 八陵有神護俎豆戰馬不嘶春草生靜閱龍韜
坐永夜海風吹斷胡笳聲

終南仙人引走筆遣懷

終南據形勝隱淪共墟里中有千年不死之真人鶴
髮垂垂過兩耳門無徵車道長存平生懶到咸陽市
青山有主百靈護竹杖通靈山鬼妬化作蒼龍乘海
雲巨鯨伏鬣洪濤駐驚回任公釣觸倒扶桑樹力窮
萬里知所歸掉頭西秦靈復聚老夫神變物相因內

蘊不關天地卷

夷齊頌贈別許計部子乾北上

衝寒苦歲暮轉餉虛城納款九邊解
朝廷專養兵歸來鄴下陽春生相逢歷談河漢傾天涯形勝一指顧碣石勢勢度前橫山插海波真北平弔古乃知風俗厚夷齊繼國兩分明千年登眺無限情孤竹已空舊封土吳中往事發囊聲魚腹藏劔霸圖成伯叔采薇甘餓死白日並耀首陽名人間共仰聖之清計曹索賦壯東北離亭返照催王程一樽聚散望燕京風色蕭蕭班馬鳴

銅雀臺弔古歌

因觀王勃沈佺期五言弔古出乎一箇機軸漫成長歌畧

見予意

龍飛白水承火德千里草青漢家厄曹瞞乘鉞剪群

雄獨據中原此盡力蓋棺一縮九州心西陵日暮愁

雲色地荒銅雀空莓苔世變銅駝祗荆棘亂機相仍

天有知長風忽來正嘆息歌舞尚多身後情玉顏慘

澹雕欄側斷腸雨淚灑衡漳嗚咽至今流不極流不

極悠悠復悠悠那見翠華旣宴遊勝景無窮樂有限

建安人去浮煙收詎知千載鄴下客不教寂寞河山

秋却憶騰蛇乘霧翻自謂曹公有云騰蛇為土灰松楸直上

儼豪氣

癡兒嘆

傳家盡說生男好兒童使性殊相惱
珍惜何異掌中珠漸長雙鬢尚懷抱
爺孃鍾愛此骨肉竟日摩挲隨所欲
千回索果顏色喜一時不應出門哭
手剜苔墻罵聲高樹烏驚飛過鄰屋
暫輟縫衣虛探囊指顧南園棗將熟
青青味溢空盈枝難解癡兒叫怒時
樓頭日落暝雲合上有蒼天知不知
人間恩怨古來事小大相關背燈睡
奚奴忽報燈花開笑起呼杯聊一醉

古怨

阿郎別家春草短蓮葉又歛清霜滿
朱欄拂雲江上樓玉娘纖手弄鵝管
竒調能令煙水白寂寞芙蓉失顏色
老龍驚動脫明珠遽走團光留不得
寧思河北邯鄲路門前舊種垂楊樹
花飛恨不到天涯倦鳥安棲共朝暮

賦得買絲繡作平原君寄山中故友

登臺北瞻此何世謾嗟寥落依松桂
英雄有待豈徒老澤龍神變隨巨細
黃金買絲秣陵市好繡平原趙公子
想像當年下士心煙薰古色宛相似
萬絲無迹天巧成吳姬亦知豪俠名
身後寧復談縱橫野雲聚

散猶秦兵異代重之獨長吉下簾焚香共一室

示秣陵王卜者長歌

杖藜來自建業城何術遂有江湖名鄴中共訝嚴君
平心懸日月照萬里西向玄圃東蓬瀛幾言入微誰
復精歷窺千山蟻穴殊分明衆流不混濁與清剖魚
得子信無數能辨孰爲龍兮孰爲鯨龍施霖雨鯨翻
海世間靈異由天成憶昔梁園初識面下簾對客談
貴賤一談貴人文鳳來梧桐正花彩雲見又談窮苦
水塞河鷺鷥俛首冒霜霰野夫問命却不同上指老
鶴仍飛九霄徧謂我八十餘年可到否詎學涓川垂

釣叟 聖代踈慵無所繫花下徵歌時進酒慎勿太
繁且塵垢高士傳中何必有壯年排難不畏人而今
世路好緘口京西山水昔遊處昨宵夢掇湖中藕還
擬薊門走馬搖絲鞭紫氛碧霞浩相連山靈暗護鬼
物遁岸幘醉呼身似顛無限精華方寸貯爾露天機
何見許白頭不死更探竒望望安期空棗樹傳書道
來竟不來月出深松獨延佇百歲九骨草同枯神追
揚馬越徐庾王生之言起予興說與香山舊禪侶

池龍嘆示山右知己

荒池龍眠不作雨每啖瓊英五花樹群命至微受涎

沫蛙畫續紛此相聚亂跳齊聒了無益獨安元氣靜
爲主崢嶸頭角出兩尖遽駭耕夫走牧豎能縮寸絲
隨所容變化叵測世罕覩蓄精藏神渾若癡轟雷不
動雲細吐四郊陰晴間自如半畝澄清涵太宇宇宙
茫茫幾同類晦迹寧爲聖朝瑞不向勞者較全功
豐年守窟農桑地靈津多補殊相忘遮莫縱橫抱珠
睡胡不張鱗振鬣海東避奮威觸斷孤嶼根天吳喪
魄儼如醉大鵬歛收歛海風長鯨敢逞吞舟勢不妨
波底織綃機罷梭恐墮鮫人淚屈伸見志何雄哉巨
濤突兀雪山堆却怪驅石架橋秦皇死復令泛舟採

藥徐市回雙睛閃光射蓬萊衆仙正列金銀臺丹霞
冉冉乘空來懶性自由激萬里試將混沌鑿開造物
胚聖愚埋骨何須哀坐讀南華白日短窮居幽寂復
誰伴几席有塵好自拂衣裳有色不可澣其如鄰翁
笑踈懶皎月低窺著書館千古一時天外心餘生無
恙百事緩野寒水涸群蟲盡嘆息空林落葉滿

澗松吟

終南山高上無極喬松秀拔擁澗石深根長滋造物
津千年誰奪蒼龍脉猿鳥來往敢攀緣神明扶持爲
正直道流荷鑿不回顧地底茯苓限靈液靈液補人

竟何功樹精有知自愛惜傲心孤立冰霜天清響驟
來風雨夕黑藏仙蓋太陰合山鬼暗出通幽魄古苔
厚堆紛綠毛海鶴飛去不留迹何當避世此結廬相
依共壽容顏澤俯仰乾坤惟一家紅塵滿眼人間窄
爲許徂徠爲勝境雲霞時復映叢碧兒童寒裳拾松
子敲火煎茶款禪客漸看斜影到匡牀月轉踈窻敞
虛白

擬太白夜泊黃山聞殷十四吳吟坐對劉元善偶成

黃山夜泊蘆花灘北斗垂天篷底看有客吳吟促我
興調高上徹浮雲端蛟龍側耳海波靜猿狖無聲山
月寒悠悠半空倏忽墮金石交音滿吾坐曲罷始聞
新都鐘楓林煙岸閃漁火今夕佳會復何許乘秋早
發橫江舵

法雲篇送蕪上人訪吳楚真僧

法雲不斷隨高蹤洗鉢寒潭悟毒龍千歲枯藤四海
杖半山古寺五更鐘野店餘齋飼飢鳥叅禪直上匡
廬峯纔盡三吳又經楚衰草園陵不弔古暫寄人間
未壞身獨入風林伏嘯虎夜逢老衲說楞嚴門掩篝
燈正秋雨

江淮篇贈別董中丞叔化赴南都

龍飛淮西四海一中丞秉鉞才無匹洛下文名更武
功白晝霜威動蕭瑟不聞村落嘯群鴟始信客行日
自吉憶昔島夷爭陸梁野塘岸坼鯨波溢采桑女兒
變容顏殺氣乘春逼蠶室江甸雲屯驃騎營犒士黃
金散千鎰能用將才元老心丙魏不言漢良弼漁樵
生計任歌謠耕織人家敞蓬華龜鼉閉窟淨浮天蛟
蜃縮濤平蕩日篙師舵叟寧復喧水怪山精詎敢出
十年兩臺今最勞草疏先朝肅簪筆事關轉餉憂
非輕早起披衣獨盥櫛神明暗護永安流禦虜練兵
倉廩實海門直北亭萬艘吳舸楚帆鱗次密秣稜城

上望燕京長空無涯孤鳥失心懸丹宸侍鶴班漳南
苦吟正力疾坐披史傳夜深燈不見古人貴膠漆

賦得峩嵒山長歌寄酬劉中丞維南

峩嵒兩山橫蜀土五嶽之外更奇觀千年積雪淨含
春幾道奔泉寒迸雨四十陰洞生肉芝多少仙糧誰
是主樵蘇不到雲霞深莓苔堆徑色自古脩藤密蘿
覆澗戶衆隱忘形澹相聚真仙何之引鳳鸞老衲居
然伏豺虎神工開闢出丹青人間畫師心何苦李白
夜行見真景千仞峯頭月半吐中原有客殊自惜棧
閣衰年萬里隔恍聽杜宇枕畔啼夢魂飛越劒門驛

山靈不識鄴下狂欲往登危虛謝屐錦官城高錦江
碧殘照踈林揚馬宅兩漢接迹鍾神秀不食煙火超
凡格六朝綺麗落後塵大方雄渾浩無息謀猷大展
際昌期憲臺防秋坐深夕君不見紫微光耀 聖明
世閭闔森嚴百靈衛胡兒牧馬尚龍荒未許終童請
纓計 今皇宵旰勞宰臣黃鉞白旄任非細佳政威
聲幕南北材官乘障氣逾銳紇干凍雀向日飛太宇
茫茫絕纖翳又不見漳河流水向東逝野夫支筇望
天際

嚴閣老敏卿築錦峯臺賦得長歌寄上

錦峯揮手接飛翼元氣無涯攬不得霖雨收功身自
南邊庭納款念仍北北極瞻依爲築臺竒觀倚檻客
遲回迸泉落澗微茫轉拂水翻空開闢來晚來星垂
霄漢近滄波直下伏蛟蜃海日浮光衆鳥分湖天遠
色三吳盡吳越相連一棹通流觴勝事永和同罰酒
寧拘金谷數題詩能振玉堂風風景觸人憂樂繫稻
田稼穡端居計萬壑時尋丹洞仙九疑夜夢蒼梧帝
帝澤猶沾到子孫梅花歲晚素心存積雪凝寒罷登
眺呼童煮茗莫開門

寄贈趙中丞良弼

公以郎中督餉遼左因守
荆州加叅政俸轉浙江廉

使隨擢湖
廣巡撫

美人倏散不相聚日暮停雲低野樹當朝柱石望全
功避世衡茅自安堵憲節翩翩下浙西海夷叛後蒼
生苦湖山風景慘澹秋誰復蘭舟載歌舞知君正氣
千層霄棲霞嶺頭獨吊古奸臣骨朽忠魂在潮吼錢
塘至今怒武昌城高昔登臨黃鶴飛來銜好音初加
開府漁樵頌先得荊州父老心丹楓葉凋鄂渚夕含
思坐落天際參君不見遼陽戍壘日蕭森轉餉艱難
憂更深三韓乘秋多警急烽火夜照枯桑林 聖王
垂衣新御極默俯公卿賜顏色將術竒正服單于天

教漢虜各南北君秉旄鉞宣威德三楚無虞通萬國
馳神每向承明廬大江東流浩不息

都門酒家翁

老翁家住鳳城闈造酒謀生自不貧朝來炊黍和麩
塵醪醺待熟香且醇夢中恍聽糟牀雨坐處先沽醅
甕春紅油闌干覆楊柳青帘高曳爲招賓長條短條
催我老凋復凋兮新復新漸看兩鬢白如銀不管燕
姬爭唱供巧笑醉客喧呼殊不嗔大都世事總堪醉
半酣却憎沉醉人自覺醒眼全吾真 四朝風光惟
一身歷觀豪華壯甲第十度星霜易主頻卜居此地

幾婚嫁兒兮女兮知孝親犬能守夜鷄報晨焚香願
作太平民祝 紫宸焚香願作太平民

梁中丞乾吉劉大叅子仁同登蓬萊閣夜觀
日出賦此以紀勝事

臺省匡時同所繫豈徒退食憂侵歲桑田恐入魚鼈
鄉切爲東方赤子計蓬萊閣上坐終宵光羅星宿垂
無際直氣相扶動萬里凌空不假神明衛海日閃破
蒼茫天島雲恍開太古世風息浩波生籀文長鯨自
縮廣穴閉漢家雨露有餘澤漁父謳歌朝復夕西來
水聲非一源百川朝宗見臣職當代並全舟楫功他

日應期鐘鼎勒

雪夜過李于鱗宅適已醉臥因留宿作

雪天騎馬禁城隈何意中宵官舍開太白醉眠呼不
起惠連賦就却空來滿城朔氣侵人骨試問宮梅幾
枝發上苑寒生千樹雲西山暗落三更月起來風物
重淒淒門外日高鴉亂啼共倒清樽不歸去長安陌
上踏春泥

留別程侍御信夫宋比部汝化

孤琴瘦馬臨長陌執手那堪惆悵色雪中踈柳動啼
鴉林外斜陽催去客二子正當經濟時我向江湖任

所之故鄉意氣且杯酒天外浮雲安可期

魏氏三堂

四溟山人全集卷之二

三

四溟山人全集卷之二 終

